

Širawt ta tazzarat iktab Buləs i Timotay

Šihulawen

¹ Awa nak Buləs, anammazul n Elməsix
Yaysa s ammar ən Məššina di n Enəssefsi-nana
d Elməsix Yaysa wa dağ nəga attama-nana.

² Əhulay-in Timotay imosan barar-in wa n tidət
dağ əzəgzan əs Yaysa Elməsix. Əgmâya dağ
Məššina di n Abba, d Eməli-nana Elməsix Yaysa,
a fall-ak d-izazzabben arraxmat, əd təhanint, d
alxer.

Arraxmat ən Məššina əd təbəllant ta tolayat

Ərruxmatan fəl səssəxritan win saxraknen

³ Yur iki-nin akal ən Masedonəya, əgmâya
dağ-ak ad taqqama dağ əxrəm n Efez, fəl ad
təzzərəzay isəssəxritan saxraknen, a dağ-as tag-
gin aytedan wiyyad. ⁴ Ann-asan ad ammazzayan
əd ləkkum i mayyan ən Kəl-Əlyəhud, əd mas-
nat n əsmawan n aljadan, wər nəla təzərəst!
Aratan win wər du-tiwəyan ar tamazaq wər
təha alfoydat waliyyat, edag a n ad ədgəzan
dağ iduf n aratan win issəbdad Məššina dağ
tarrayt ta n əzəgzan. ⁵ Elməxsud n awas kay-
omarax əddi, a tu-təməl tara dağ aytedan s əwəl
iyyanda, d ənnəyaten olaxnen, d əzəgzan wər
təha təmənufəqa. ⁶ Aytedan wiyyad namagga-
gan d əššərədan win, fataqqen dağ igi ən batuten
šiyad wər nəla almağna waliyyan. ⁷ Sidaranan

ad əqqəlan imusanan n əşşərixa wa n Əttawret, ənta wərmad əgrân awa gannin wala dəx aratan win as əşşewalan əkkasan daɣ-san aşşak.

⁸ Nəssân as əşşərixa wa n Əttawret olâx as das-ilkam awedan s əlluɣ. ⁹ Nəssân dəx as əşşərixa wər d-osa fəl əddəlil n aytedan win oɣadnen, kalar osâ-du fəl əddəlil n arak aytedan, əd nəmməzray, d aytedan win wər nəksud Məşşina, əd win nasbakkadan əd win wər nəha əddin əd maggan n alfawaxışan əd win əganen iman n abbatan-nasan d annatən-nasan əd win maggan ən man ¹⁰ əd maggan n əzzəna, əd win tinəməgginen əzzəna gər za meddan gar-essan, wala şidoden gar-essan, d aytedan win din-zanzinen wiyyad, əd nəsbuha əd win tagginen tahuday ən bahu, d aytedan kul win əmməzraynen əsəssəxri wa isxan. ¹¹ Əsəssəxri wədi, igmâd-du Əlinjil ən Məşşina ilân albaraka ila tanaya. Əlinjil en da a dər-i isannattaf.

Igodan ən Buləs i Məşşina arraxmat-net

¹² Əgğodayax y Əlməsix Ƴaysa əməli-nana a di-issəfragan igi n əşşəxəl-in, fəlas əsənnəhi a di-iga əd təfləst, isannafran-i fəl a das-əşxəla, ¹³ nak was harwa das-wər-əlkema tibuduraq-qu, sakna inalkiman-net arkanay, rabbadaq-qan, mişan ihanattat-i fəlas əljəhəl d iba n əzəgzan sər-əs a daɣ əgeɣ awen. ¹⁴ Təzzar isannahal-i Əməli-nana tehakkay n arraxmat-net, ikf-i dəx əzəgzan əd tara win sər-na du-tətaway tassaq əd Ƴaysa Əlməsix.

¹⁵ Batu ta, igmâd-tat aşşak, təhor dəx d i tat-izzəgzanan ketnet təmosat as: Əlməsix Ƴaysa

osâ-du əddənet fəl ad assafsu inasbakkadan as nak eyaf-nasan. ¹⁶ Mišan ihanattat-i Məşşina, fəl a sər-i assaknu Əlməsix Yaysa nak a ogaran inasbakkadan, tazaydart-net ketnet, əqqələx almasal y aytedan win sər-əs z'əzəgzənnen əgrəwan təməddurt ta təxlalay.

¹⁷ Ya Əmənokal n Amaylol
 Wər nətəməttəy har faw
 wər itəwənəy
 Wər ila əmidi.
 Saɣmar d ədkul kul
 kay a dər-san ihoran har faw.
 Amin!

Awa iwaran Timotay

¹⁸ Ya barar-in Timotay, ənta da arat was kay omara, amaran inimannak əd batuten šin fallak əgan ələwlitan dat awa əs tilalt n Infas ən Məşşina, imosan as, batuten šin di ag-enat təzolinak daɣ əməgər olâxan wa təge d aytedan win safraynen awal ən Məşşina. ¹⁹ As tətəggəy adi təttafəx əzəgzan-nak, təzinamazlaya wəllen gər awa olaɣan d awa wər noleɣ. Aytedan wiyyad teway-du sər-san tugəyt s adi as ibarajjat əzəgzan-nasan. ²⁰ Aytedan win di ih-en Himani d Alaskandər. Oyyey Aşşaytan orn-en fəl ad aknin, ammazzayan d ikus ən tarna i Məşşina.

2

Ənnizam n Əlkənisat

Əlyibada daɣ Əlkənisat

¹ Əgmâya daɣ-wan daɣ adi ad təgammayam daɣ Məşşina a iknan tumaxlaten n aytedan,

tətattaram, tətansayam-tu y aytedan kul, tətigudəyam-as awa iga y akk awedan. ² Ad tətaggim adi da i mənokalan d aytedan kul win əhanen taɣmar fəl ad nagu təməddurt tədrârat, iha alxer daɣ nəksud Məşşina d əzzəbun daɣ əkkulluk n anamod. ³ Adi a olaɣan, igray y Ənəssefsi-nana Məşşina, ⁴ irân əsəfsi n aytedan kul, awədan masnat ən tidət.

⁵ Fəlas Məşşina iyyanda ɣas a t-illan, awedan deɣ iyyanda, a t-imosan ɣaysa Əlməsix a imosan almawakkil gər Məşşina d aytedan;

⁶ ikfa iman-net, fəl ad addarfen aytedan kul.

Ənta den da təgəyya ta iga Məşşina daɣ alwaq was imal.

⁷ Təgəyya ten da as di-isannafran Məşşina y a tat-aga. Ig-i əməggi ən salan n Əlinjil, d anammazul. Issok-i aytedan win wər nəmos Kəl Əlyəhud y a tan-sassaɣra awa iqqalan əzəgzan əd tidət. Awa ənne da, tidət a imos, wərge bahu.

⁸ Daɣ adi, daɣ adag kul, as təddewam y əlɣibada, əgmâya daɣ meddan ad tattaran ədkâlan ifassan-nasan s əwəl zəddigan wər iha alham wala əsəmməsəndəd. ⁹ Əmmək en da as areɣ ad tagginat tədoden telassay təzzibanat, təstârat, təhât edag. Ad wər ədləgnat iman-nasnat əs lətfan əmmittaynen, wala s urəɣ əd təssaɣeren madeɣ tabdoq təknât əzzəwi.

¹⁰ Kalar ədləgnatet iman-nasnat əs mazalan olaɣnen win tagginat tədoden šin əksudnen Məşşina. ¹¹ Daɣ alwaqan win əsəssəɣri n əljəməɣat, tantut iwâr-tat ad tədrər taknu əsəsəm a daɣ təbbirdag y əməsəsəɣri. ¹² Wər əkfe tantut turagat n əsəssəɣri wala da tizart y

aləs. Kalar iwâr-tat əsəsəm. ¹³ Fəlas Adəm a d-ixlak Məşşina day tizarat, dəffər adi ixlak-du Xawa. ¹⁴ Harwa, wərge Adəm a issəxrak Iblis; kalar tantut a issəxrak, təqqal tənəmməzrəyt. ¹⁵ Mişan ya ad təgrəw əlxillas s əssəbab n as tətalu bararan. Amaran şidoden ad əxləsnat as zazzawatnat day əzəgzan-nasnat, təh-enat tara, əgānat alxal zəddigan, əgānat awen day əzzəbun.

3

Imuzaran n Əlkənisat

¹ Illikan as awedan was imos amadamməd-net tişit n əmuzar ən nalkiman ən Ƴaysa, əşşəxəl ihossayan a ira əddi. ² Əmuzar n Əlkənisat iwâr-tu a tu-wər-illa i ifragan a day-as d-inəy ark arat, izlâf tantut iyyadda, iydal i təntut-net, imos awedan səmmidan, innoda day əwəl-net, ila əzzəbun, ih-ay amagaru, ifrag wəllen əsəssəxri. ³ Wər t-itəqqəl əməşwi n esmad wala awedan n əməkkənəs. Kalar əmuzar n Əlkənisat iwâr-tu ad imos awedan ilân aladab, wər imos ənadlam, wər iwwəlat azrəf. ⁴ Iwâr-tu ad ittâf s əllux tanat n aɣaywan-net, əbbirdagan bararan-net, iga awen s əzzəbun. ⁵ Awak awedan wa wər nəfreg ənəttaf ən wala aɣaywan-net, manəmmək as z'issən day nalkiman ən Ƴaysa? ⁶ Ad wər iqqəl awedan as səket ilkam i Ƴaysa fəl ad wər idkəl iman-net dənnəg aytedan təzzar udu day tədləmt ta day iggədlə Iblis iman-net. ⁷ Iwâr-tu ad imos awedan əflâsan aytedan win wər nəmos əlməsixitan, fəl a tu-wər-iməl i ifrâgan a day-as d-inəy ark arat, ifətəqqat day taftaw n Iblis.

Imadhalan n Elkənisat

⁸ Imadhalan n Elkənisat, əntanay da iwâr-tan ad əttafan əzzəbun-nasan, təssiflas dəx batunasan. Ad wər iqqəl alxal-nasan tessay n esmad wala tattan alxaram. ⁹ Iwâr-tan ad zizawen dəx tidət ta tənafalalat tēhât əzəgzan s Elməsix, ilen ənnəyaten zaddognen. ¹⁰ Təwəjərrəbanet təzzar, dəffər adi kud wər t-illa i ifragan a dəx-as d-inəy ark arat, assantin əşşəxəl wa n tişit ən madhalan. ¹¹ Emmək en dəx as şimadhalen n Elkənisat da iwâr-tanat ad əlānat əzzəbun, wər tizəmnat, sammədnat, əydālnat dəx əkkulluk n arat. ¹² Emadhəl n Elkənisat iwâr-tu ad ixdāl i təntut-net, iga ənəttaf olayan i bararan-net d aɣaywan-net. ¹³ Imadhalan n Elkənisat win tagganen əşşəxəl-nasan s əlluɣ garrawan almaqam d ikus n aşşak ikmalan dəx əzəgzan s Elməsix Ƴaysa.

Essiran ən tarrayt ta n Eməli

¹⁴ Attama wa əgəx n a kay-ənəya tarmad wər di-igdel a dak-in-əktəba isalan win di ¹⁵ fəl ad iqqəl as kud fall-ak in-əlləleɣ, da ad təssənəɣ alxal was imməkkan ad t-agin aytedan dəx ahan ən Məşşina di n Aməɣləl a t-imosan Elkənisat. Elkənisat ta ənta a təmosat təgəttawt ta n təsəkbəlt ən tidət. ¹⁶ Igmâd aşşak as əssir wa danəɣ-isannafalal Məşşina a t-imosan Elməsix, i zəwwəran:

Inafalal imos awedan.

Iggəyyat Infas ən Məşşina as oɣâd.

Ənâyan-tu angalosan.

Tiwaggan salan-net

y aytedan win wər nəmos Kəl-Əlyəhud.

Æzzigzanan sər-əs aytedan daɣ əddənet ketnet.
Immədkal əs jənnawan əs tanaya.

4

Əsəssəyri wa olayan d amaşşaxal n Əlməsix

Ərruymatan fəl səssəyritan ən bahu

¹ Dər iga awen da ya Infas imâl s əlluɣ as daɣ azzaman win əlkammen, aytedan wiyyad ad ammazzayan d əzəgzan s Əlməsix, əlkaman i kələsuf saxraknen, əd təssunen n Aşşaytan. ² Təssunen šin əfálnat-du inəsbuha n əlmunafıqan, əs əmmutan wallan-nasan, ³ əgdâlan azalaf, ərɣâman fəl tattay ən wiyyad imensewan as Məşşina a tan-d-ixlakan fəl a tan-atšin aytedan win əzzəgzannen əggodayan i Məşşina, əntanay a əssanen tidət. ⁴ Fəlas awa d-ixlak Məşşina kul olâɣ. Wər t-iha a xaraman, iggudəyet ɣas awedan i Məşşina təzzar atšet awa ira. ⁵ Id izzizdak-ku awal ən Məşşina əd təwatray.

Amaşşaxal wa olayan ən ɣaysa Əlməsix

⁶ As təmmâlaɣ isalan win dak-əge da i məzzəgzan, ad təqqəla amaşşaxal olâɣan n Əlməsix ɣaysa, iddaran s Əlinjil imosan ənəfilal ən Məşşina daɣ ɣaysa, əd təssunt tolâɣat tas təsle. ⁷ Ad wər təsasamaɣ i mayyan ən bannan əmmizraynen awal ən Məşşina. Kalar səlməd iman-nak təməddurt ta daɣ tosaɣa əd Məşşina. ⁸ Əšinən ən taɣəssa wər tu-taha tənfa tagget, mišan əšinən n əwəl ləkkum y awal ən Məşşina, tah-ay tənfa daɣ tarrayt kul, fəlas nəgarraw sər-əs əmərədda təməddurt tas iga

Məşşina arkawal-net, nəgrəw-tat deḡ dəffər iba. ⁹ Batu adi igmâd aššak, tənňihat da sər-əs arđın aytedan kul. ¹⁰ Nənnây arkanay, nəbbillan fêlas nəgâ attama-nana daḡ Məşşina di n Amaylöl imosan Ænəssefsi n aytedan kul, wəllen win sər-əs əzzəgzannen. ¹¹ Aratan əddi da win as za tətamaray aytedan təsasaḡraḡ-asan-tan.

¹² Ad wər tayyaḡ awedan waliyyan alkik fəl as wər tawaššera. Kalar əqqəl almasal i məzzəgzan s awa təganna d alxal-nak əd tara ta kay-təhat d əzəgzan-nak əd tazdak n əwəl-nak. ¹³ Ægməd əs taḡaray n Awal ən Məşşina i məzzəgzan, d əsəhəl-nasan d əsəssəḡri-nasan har din-asa. ¹⁴ Ad wər taqqama wər təššəşḡala təhəkkut ta təgrawa, ta kay-ikfa Məşşina s awal wa sər-ək iga ələwli iyyan əs tarrayt n Infas ən Məşşina, assaḡa wa kay-əssəwəran muzaran n Ælkənisat ifassan. ¹⁵ Aratan win dak-əməla da, ədgəz daḡ-san, fəl ad ənəyan aytedan kul əməttəy wa tətəgga.

¹⁶ Æssən daḡ man-nak, təssəna ənta da daḡ aratan win təsassaḡra, ad wər tammazzaya d igi n adi. As tətəggaḡ adi, ad tassafsaḡ iman-nak, tassafsa deḡ aytedan win dak-sasannen.

5

Awa iwaran Timotay gar-es əd məzzəgzan

¹ Ad wər tətihərəššəḡ iḡmaran. Tagg-asan ənnəsixa šilat ən wa za taga y abba-nak; tagaḡ i meddan win madrornen ənnəsixa wa za tagaḡ i mədrayan-nak. ² Šiḡmaren ag-asnat ənnəsixa wa za taga y anna-nak. Taga deḡ i tədoden šin

madrornen ənnəsixa wa za tagax i tēmədrayen-nak, iga awen s əwəl zəddigan.

³ Səxmər şidoden şin as aba meddan-nasnat wər əlenat əşəqqax a dər-əsnaŋ inəttafan, təssəna daɣ-asnat. ⁴ Mişan kud əlānat bararan madəx ihayawan, wədi zəmmizəlanet təksədanasan Məşşina s ad əssənan daɣ marwan-nasan, ərzəman-asan əsədwəl wa tan-əgan fəlas adi da igrəzan i Məşşina.

⁵ Amaran ta wər nəla i dər-əs, təxsâr əd man-net ənta əddi təgət attama-net daɣ Məşşina, təgəmmay daɣ Məşşina a iknan tuməɣlaten-net, tətəttar ehad ezal. ⁶ Mişan as imos as tantut as wər idder aləs-net, təga tēməddurt a daɣ təlkām i tara ən man-net, kud imos as təxəssanet təddar, da fəl aganna wa n tassaɣ-net əd Məşşina şilat n as wər tədder. ⁷ Ənta əddi da awa as kay-iwar a tanat-tətamara sər-əs, fəl a tu-wər-iməl i ifragan a daɣ-asnat d-inəy ark arat. ⁸ Amaran awedan wa wər nəssen daɣ aytədan-net, wəllen win nəmmuray-net, wədi zun as oyya əzəgzan-net, işşam-as fadda awedan wa wər nəzzəgzan.

⁹ Ad wər təktəba tantut as wər idder aləs-net daɣ şin as tətəlal Əlkənisat ar s ad təga sədisat tēmərwen n awatay madəx tokay-tanat, ənta da, wər tat-ides ar azalaf iyyanda. ¹⁰ Əggəyyen dəx aytədan as tətəg imazalan olaxnen, əmosnen əsədwəl olāxan ən bararan-net, d aməgaru, wər təsəssəgar iman-net igi n əşşəxəl a iqqal i məzzəgzan, əd tilalt y aytədan win məxatarnen, d əmazal n arat kul wa olaxan s əwəl iyyanda.

¹¹ Amaran šidoden šin aynaynen, šin as wər ədderan meddan-nasnat ad wər təqbəla tilalt y-asnat fəlas as daḡ-asnat d-inkar Iblis, ad usafnat azalaf əššəḡəl y Elməsix. ¹² Təzzar ibəz-tanat əššəriḡa ən Məššina s agamad wa tanat-iga əzəḡzan-nasnat s ənta arkawal-nasnat wa azzaran, ¹³ aqqaminat wər əlenat əššəḡəl waliyyan ar ilum ḡər nan. Adi ogar-tu âs, a tanat-təḡḡəz šizmit; əššiwəlnat daḡ taḡawšiwən n aytedan, d aratan as wər imməkkan a daḡ-san šawalnat. ¹⁴ Daḡ adi šidoden šin aynaynen, šin as wər ədderan meddan-nasnat, əssofaḡ ad əzləfnat, ilenat bararan, əssənnat daḡ ḡawnatan-nasnat fəl ad wər əḡrəwnat i maksanan-nanaḡ tarrayt n a daḡ-na d-ənəyan ark arat a sər-naḡ ənnan, ¹⁵ fəlas šiyyad daḡ-asnat har âs əxraknat, əlkamnat y Aššaytan.

¹⁶ Kud təll-ay təlməsixit təlât šišəqqəḡən as wər ədderan meddan-nasnat, təssənet daḡ-asnat, aqqaminat wər əmosnat əzuk y Əlkənisat, fəl ad tilal i šin wər nəla i dər-əsnat.

Imuzaran n Əlkənisat

¹⁷ Imuzaran n Əlkənisat win tagginen tizart tolaḡat əhoran d ətəwəsəḡmar imosan ənətfus, wəllen win tagganen təlxutbat sasayrin Awal ən Məššina. ¹⁸ Fəlas a ənnan Əlkəttaban: «*Ad wər tədbəḡa y azḡar wa təššəšḡala*». Ənnân deḡ: «*Amašḡaḡal ihor d alxaq-net*».

¹⁹ Ad wər tətattafa taḡtəst tətəwaggat y əmuzar n Əlkənisat ar s a *tat-əḡḡəyyen əššin aytedan madəḡ karad*. ²⁰ Imuzaran n Əlkənisat win tagginen ibakkadan, raqqam-asan dat

Ɛlkənisat ketnet, fəl ad təggəz tasa əlməsixitan win hadatnen. ²¹ Onsayaq-qay fəl Məşşina d Ɛlməsix Ƴaysa d angalosan win isannafran ad təlkəma y aratan win as kay-omara da, daɣ wər təgeɣ arak torda waliyyat, wala təmərıt.

²² Ad wər tərrurəda əsəwər ən fassan-nak awedan, wala deɣ tileɣ adagar daɣ bakkadan n awedan waliyyan. Agəz iman-nak, tətəfa tazdak-nak. ²³ Mazzay əd tassay n aman ɣas, kalar sassu arat n esmad n alɣanab ad anfu adi tadist-nak, anf-ik daɣ təfrəyt ta sər-ək du-təsaxlayat. ²⁴ Ɛllan-tu aytedan as ibakkadan-nasan wər tan-iqqərat arat, tiwassanan harwa dat əşşəriɣa, mişan wiyyad dəffər tərut ad tawanayan win-nasan. ²⁵ Ɛmmək en daɣ as, imazalan win olaynen wər tan-iqqərat arat, amaran wala win iqqərat arat da wər təhigin əɣbâran.

6

Eklan əd məssawsan

¹ Ɛlməsixitan kul win əmosnen eklan, iwâr-tan saɣmar ən məssawsan wəllen fəl ad wər əkkesan aytedan tarna i Məşşina, wala deɣ alkin təssunt ta nəsassayru.

² Amaran win daɣ-san əlan əlməsixitan, ad wər assaknin məssawsan iba ən saɣmar fəlas dər-san əmosan arat iyyanda daɣ əddin. Kalar aginet-asan əşşəɣəl ofân was kala a dasan-tu-taggin, fəlas aytedan win garrawnen tənfa n əşşəɣəl-nasan əddi, əntanay da əlməsixitan a əmosan sinahalnen ətəwəra.

Ammaran ækkanen Timotay imosan æmaray æs Mæššina

Isæssæxritan ən bahu d əzəgzan wa n tidət

Adi a za tasassaxray aytedan tæzzædgəzaq-qan day-as. ³ Awedan wa isasaxran aratan wər nəmos win dak-əmala da, harwa wər ilkem y awal wa isxan n Əməli-nana Ƴaysa Əlməsix d əsæssæxri wa d-itawayan təlɣudəla, ⁴ wədi awedan anasbarag a imos n aljahil tæssiran tara ən tamazaq əd takat wər nəga ar fəl almaɣna n əlxərəfan. Itaraw-du adi manjəɣ əd tamazaq d arak batuten d arak tordaten, ⁵ əd məzrəyan wər nərriz gər aytedan as wər oɣednat ənnəyaten-nasan, təgmad-tan tidət. Əgân iduf n âs a tan-isəggərgəs iguz n əddin. ⁶ Mišan illikan as, təksəda ən Mæššina təmos təgərgist zəwwərat fəlas təhakk-anəɣ təməddurt a day nəgda s awa nəla. ⁷ Fəlas wər neway wala as du-nəggaz əddənet zund əmmək en day as a tat-nəgməd wər neway wala. ⁸ Day adi, agdet-anəɣ as nəla isudar əd talassay. ⁹ Amaran aytedan win əranen təgərgist, tifətəqqen day jarra-batan, əd taftawen d arak deranan aggotnen a tan-əkmanen, a du-wər-nətiwəy s awedan ar əbərəjji d əhluk. ¹⁰ Tara n əzrəf a təmosat ələsəl n əššur kul. Əllan-tu aytedan s awa das-əgan day tara, əxrakan, igmad-tan əzəgzan-nasan, ewayan-du əs man-nasan šiməgraz aggotnen.

Ammaran ækkanen Timotay

¹¹ Amaran kay Timotay, imosan æmaray æs Mæššina, darrag y adi ketnet. Əgməy taqqat, əd təksəda ən Mæššina, d əzəgzan, əd tara, əd

zəmmerat, əd talmat. ¹² Agu təbəllant ta tolayat, təmosat aggaz n əzəgzan. Əqbəl təməddurt ta təxlalat, fəlas Məşşina iyr-ik y a tat-təgrəwax, amaran batu-net a dağ təmalax əzəgzan-nak dat təgəyyawen aggotnen. ¹³ Omâraq-qay fəl Məşşina a itaggin iman dağ arat kul, d Əlməsix Yaysa a imalan s əllux əzəgzan-net dat Fons Bilatəs, ¹⁴ ad təlkəma y awas kay-omara, a daq-qay wər iwer lahan waliyyan, wər t-illa i ifragan a dağ-ak d-inəy ark arat, har d-inəfiləl Əməli-nana Yaysa Əlməsix. ¹⁵ Ənəfilal-net ad agu dağ alwaq wa issənsa Məşşina y awen,

Ənta a ilan albaraka

Ənta yas ənaxkim wa n tidət

Əmənokal ən mənokalan,

Əməli ən malan

¹⁶ Wər itəməttəy har faw

Izdâx dağ ənnur

Wər din-itəwəhiz

Wər t-illa awedan as kala ad t-inay

Wala ifrag anay-net

Ənta a ilan saymar əd tarna har faw.

Amin!

Awa iwaran iməggərgas

¹⁷ Amər win əggərgasnen dağ əddənet s ad wər ədkelan iman-nasan dənnəg aytedan wala agin attama-nasan dağ təgərgist wər za nahag. Amər-tan s ad t-agin dağ Məşşina a danax-ihakkin arat kul s igət fəl ad nugu təməddurt a dağ nəddəwat. ¹⁸ Amər-tan s əmazal n awa olaxan, aggərgasanet dağ mazalan olaxnen, təggəzet-tan tahakkay, ardinet əs tədrəwt d

aytedan. ¹⁹ Emmək di as z'əššidəwan i man-nasan tægərgist a za təqqəlat təsəbdət tolaɣat y awa d-izayan əzəl a ilkaman fəl ad əgrəwan təməddurt ta n tidət.

Ənnəsixa wa ilkaman əd təhult

²⁰ Ya Timotay, agəz awa kay-issəɣlaf Məššina. Nəməggəg əd batuten ən bannan əmmizraynen əddin, əd tamazaɣen əgânen dəɣ təssunt ən bahu. ²¹ Wiyyad əlməsixitan əlkânnen i təssunt tədi, əxrakan əmməzzayan d əzəgzan.

Məššina ya təgeɣ-awan arraxmat-net.

**Ḑlinjil ɛn Ḑaysa Ḑlməsix Itawann-as dex
Arkawal wa Aynayan
Tamajaq, Tawallammat: Ḑlinjil ɛn Ḑaysa Ḑlməsix
Itawann-as dex Arkawal wa Aynayan New Testament
Le Nouveau Testament en tamajaq tawallammat,
écriture latine**

copyright © 2015 Wycliffe Bible Translators, Inc.

Language: Tamajaq, Tawallammat

Contributor: SIM International

All rights reserved.

2020-12-01

PDF generated using Haiola and XeLaTeX on 22 Feb 2024 from source
files dated 29 Jan 2022

3aaeb7b2-4a3b-51fe-8c2d-ed8c05d4be0f